

20/05/2000

Nama Ketua Pemuda MIC jadi sebutan

SEREMBAN, Jumaat - Nama Ketua Pemuda MIC Selangor, S Murugavelu, kini hangat diperkatakan sebagai bakal calon Barisan Nasional (BN) dalam pilihan raya kecil Parlimen Teluk Kemang, 10 Jun depan.

Ini berbeza berbanding beberapa minggu sebelum ini apabila nama S Sothinathan, yang juga Setiausaha Politik Presiden MIC, Datuk Seri S Samy Vellu, diramalkan dipilih sebagai calon.

Menurut sumber, walaupun pangkalan politik Murugavelu di Selangor, beliau adalah anak kelahiran Jelebu dan dikatakan rapat dengan penyandang Naib Presiden MIC, G Palanivel.

Katanya, Sothinathan pula dilahirkan di Port Dickson, juga ahli MIC Selangor dan sejak kebelakangan ini sering dilihat 'turun padang' di Port Dickson.

Selain itu, sumber berkata turut disebut-sebut sebagai calon ialah Ketua MIC bahagian Petaling Jaya Selatan, N Subramaniam, yang berasal dari Rasah, Seremban.

"Bagaimanapun, terpulang kepada Perdana Menteri yang juga Pengerusi BN, Datuk Seri Dr Mahathir Mohamad, untuk membuat keputusan akhir," katanya di sini, hari ini.

Pilihan raya kecil Parlimen Teluk Kemang diadakan berikutan kematian penyandanganya, S A Anpalagan yang juga Setiausaha Parlimen Kementerian Kesihatan, 28 April lalu.

(END)